

# **Basef Ifimba Pol Nanda'ef Fali' Fagafe'ma Tesalonaikakai**

## **Basef bandafi Pol nali' nanda'ef fagafe'ma esis Tesalonaikakai**

1:1 Pol na'i basef bu'wafi ma God naloma Jisas  
Krais mogatopalopas

1:2-3:13 Pol na'ipasa maol bu'wani nanda'ana  
nagatopalopas ama na'i nofo'o nogatilis

4:1-12 Pol na'ipasa waf bu'wafi hilili'i sogailafi  
ma sonda' okom Godi bo'oma esis

4:13-5:11 Pol na'ipasa nemaf dembinai ape'inai  
nogafi'afii

5:12-28 Basef akutaifi esis sogailafi

<sup>1</sup> Ae' Pol aloma Sailas Timoti wape na'a'e. Ea' anda' basef ifimba fafe'mago ipa' Kristen pagape wambel Tesalonaikakai. Ipa' pape paloma God ahamapa ape'inai naloma Dembinai Jisas Krais. Ipa' Kristen pape paloma amom ea' amamipai si'ipa.

Afa' wa'i atiasi God notopalopago ipa' dowafa opalef ipe'ilifi fegape awanelef.\*

*Esis Tesalonaika sahapifana banages sape hilili'*

<sup>2</sup> Nimaguf hiafi danda afa' wanifela God lifilafi ma ipa'. Ea' wa'i agof ipe'igufi wanda' betenepa.\*

<sup>3</sup> Afa' ina ala'uta tahafa ma waga'ipa God ahamapa ape'inai ma hapif ipe'ini nigafilai waf fasifi ma ipa' owa'. Fowa' ipa' paso' nelelemba

---

\* **1:1** Fl 1:3-4; Kl 1:3; 2 Te 1:11; Ap 17:1-10; 2 Te 1:1  
13:13; Kl 1:4-6      \* **1:2** 1 Ko

God naloma anis daias wapani. Ea' dei' panda' maol numa'wini. Ipa' ukup pape banagepa pehafa Dembinai Jisas Krai. Ea' wandabeten nimaguf danda ma ipa'.

<sup>4</sup> Ipa' Kristen alipipai, God nase'epa nembel ipa'. Ea' afa' ogawa anen nosahe'epa ea' ananipai si'ipa.\*

<sup>5</sup> Basef ifimba bu'wafi Godi fowa' ogofa'afii, ifimba ina fataga ma ipa' dowaf si'i anif basef wafifi, owa'atin. Ambal bu'unai Godi nowa' banaga basef ifimba ma banagami ananiami ea' wafi'i wa'ipipaef. Ea' fanda' ukup ipe'ipi banagep pahapifana banagepa. Waf fowa' wape walomepa wanda'afi, ipa' pegawaf.\*

<sup>6</sup> Isimba atis dei' pegawaf apaila Dembinai. Hiahaom akafimi matagamepa, apa' owa' pefa' basef Godi, ea' Ambal bu'unai Godi nasa'mai opalef ipe'ilifi, andagalaepa.\*

<sup>7</sup> Ea' pihimba'masa waf fasifi isimba hiasi anis amam nematawa sagahapifa Kraisi sagape itap apamba bieyip lu'wagoma Masedoniai Akaia.\*

<sup>8</sup> Basef Dembinaii ipa' paga'ipasafi fegal fa'i fafe' si'i wata ta'i tagafe' mehip. Ina fafe' Masedoniai Akaia atogon, owa'atin. Anamba hiagoma esis same' basefa ipa' pagahapifa God. Afa' ina wa'ipa epes isimba, owa'. Ipa' pali' paso' opalefa God andeande'.\*

<sup>9</sup> Dei' esis atis sa'i basefa ipa' pandagala pa'i nemaf bu'wafi ma afa' ea' pame' basef afa'ifi fowa' afa' wanofa wagafe'mago ipa'. Esis sa'i ipa'

\* 1:4 1 Ko 2:4-5; 1 Ko 4:20

\* 1:5 1 Ko 4:16; 2 Te 3:9; Ap 17:5-9

\* 1:6 1 Pi 5:3

\* 1:7 Ro 1:8

\* 1:8 Ap 14:15

apakwaha hiahaom amamba ambagof awami fowa' ipa' panda' lotumami. Ea' pambema opalef pafe'ma God. Ea' dei' panda' maola God endilisi-nai, owa' nogaga'ia, nagape atapinai.\*

<sup>10</sup> Ea' esis sa'i ipa' pape pehafa Nogamana ananinai anaf nokwaha heven notanima nogafi'i. Anen Jisas, fowa' naga' God nafelanai wapani. Owagama God okom a' numbutinama epes ami sanda' waf awafii. Owa' dei' Jisas nelefatapa ea' ma okom anamba aunai.

## 2

### *Maol Pol nanda'an Tesalonaikai*

<sup>1</sup> Alipipai, ipa' pegawa ea', fowa' afa' wagafe'mago ipe'i, maol inimba afa' wanda'ani ina nenalo, owa'atin.\*

<sup>2</sup> Fowa' wagali' wafe' wambel ambalemba Filipai ea' sanda'afa aofa alop afa'inai, wame' akafimi endilisi. Ipa' pegawa ea'. Owa' God afa'inai nowa' banaga nelelemb afa'ilimbi. Ea' afa' ina ombal mahafa wandafa'ma esis bousi, owa'atin. Afa' banagefa wafo'o wawalapa basef bu'wafi Godi ma ipa'.

<sup>3</sup> Basef kofagefa waga'ipipafi ina wa'i onda' waf awafi ma ipa', owa'. Afa' ina waila basef ifimba putuputa'afi baso'afi wa'ipipaef, owa'atin.\*

<sup>4</sup> God atona nagwambafa natolofa wape hilili' ea' naso'afa maol afa' ma ogowalapa basef bu'wafi ananifi. Ea' ifimba atif dei' wawalapef. Afa' ina wanda' maola epes siganifela

---

\* **1:9** Ta 2:13; Ap 17:31; 1 Te 5:9      \* **2:1** Ap 16:19-24; Ap 17:1-9; 1 Te 1:5,9      \* **2:3** 1 Ti 1:11; Ga 1:10; Jer 11:20

maol afa'ini, owa'. Wanda' opeha God atona sonogahana ma maol ananini, anen atona nawalogafa nogawafa.\*

<sup>5</sup> Ipa' pegawa basef waga'ipipafi afa' ina wa'i'ipipa, owa'atin endilisi. God natolofa nogawafa ea' afa' ina wanda' maol wambaho' basefa waf kowagalasafi, owa'atin.\*

<sup>6</sup> Afa' ina wanda' opeha epes sogasa'ma agofafa, o anis daias o ipa' wapani piganifelofa, owa'atin.

<sup>7</sup> Afa' wape aposel Kraisi endilisi. Anen nas-apa'afa ma onda' maol ananini. Ea' dei' wi'i aho'ai, a' wi'ipipa dindinipa pegaso'afa anis hi-ahawes gwa'aisi mais. Apa' owa'atin. Nogota tatumba wape wagalomepa afa' wanda' waf ni-manis endilisi ma ipa', si'i ano'w nemata'w kugumafi awasi akwa'usi andeande'.

<sup>8</sup> Afa' ukup paipailipa a'owa'. Ea' wase'epa basef bu'wafi Godi. Ina wa'ipipa basef atif, owa'atin. Wase'epa opalef a'owa'. Ea' wanda'as dumbuli dombola oga' ogatopalopepa.\*

<sup>9</sup> Endilisi atis ipa' alipipai pegawa isimba, afa' wanda' maol banagambela wagawalapa basef bu'wafi Godi ma ipa'. Ea' wanda' maol wapani umafi alop afa'ipi ma gwa'aisi mais. Wanda' maol owamb alipa ina opoma ipa' atipa ma ogofa' gwa'aisi maisa ipa', owa'.

<sup>10</sup> Ipa' patilis pegawas ea' God wapani natilis nogawa ea' waf wanda'afa ipa' pagahapifa Kraisi. Waf afamba afa'ifi bu'wafi usi'ifi, ina' awafi, owa'.\*

---

\* **2:4** Ap 20:33; 2 Pi 2:3; Ro 1:9; 1 Te 2:10      \* **2:5** Jo 5:41,44      \* **2:8**  
 Ap 20:34; 1 Ko 4:12      \* **2:10** Ap 20:31; Fl 1:27; 1 Pi 5:10

11 Ipa' pegawa waf afamba si'i ahamas nanda'masaf awasi ananisi, ea' na'amba atin si'i afa' wanda'mepaf ipa' atona atin. Afa' wasa'ma wawalapefa nomonas ipe'isi, owa banagaipa.

12 Wa'ipipaef na'amba ma ipa' penda' waf fe-gafe' andeande'ma God nitilipa noganifelipa. Ea' nofalepa pafi'i piwis pegalomana anamba anen nagala'ambemagama hiahaom ananiami atumi mogogala'ma.\*

13 Fowa' ipa' pefa' basef Godi malogof afa'igufi, ea' pahapifif. Basef ifimba ina pefa'ef si'i basef epesi atif, owa'atin. Pefa' basef ifimba endilisifi Godi. Ea' basef ifimba fatopalopa opalef ipe'ilifi, dei' paila waf bu'wafi. Ea' afa' wanifela God dondola ipa' pefa' basef ananifi pagahapifana andeande'.\*

14 Ipa' Kristen alipipai, pame' akafimi na'amba atin si'i esis sagahapifa basef Godi sagape itap lu'upa Judiai. Esis sahapifa Jisas Kraisi, ea' amam nematawa Godi. Isimba atis dei' esis Juda saso'as akafimi anisa alop asasipi na'amba atin si'i ipa' wambel atembel sagase'epa akafimi.\*

15 Esis Juda saha Dembinai Jisas naloma amom profet maga' ea' sanda' wandaf banagef sali'amonafa. Sogosambala waf God okom maga'iefi sahabombaga epes hiasi.\*

16 Ea' sasopama ufa'wa afa' uga'ipas basef Godi esis sogololama anini ma nowambilasi sotanimai sogape andeande'. Esis Juda sanda'as na'amba dei' sowatani waf awafi asasifi atapif fataga lu'uf

\* 2:12 1 Te 1:2; 2 Te 2:13; Ga 1:11-12 \* 2:13 Ap 17:5 \* 2:14 Ap

2:23, 7:52 \* 2:15 Mt 23:32-33

a'owa'. Fowa' God natitilis dowaf apa' dei' okom wandafunai ananinai nafi'i natagamas nemaf akutaifi nonda'as awes lamonas.\*

*Pol okom mohafel a'owa' ma na'i nogatilis wapani*

<sup>17</sup> Ipa' Kristen alipipai, esis Juda sali'amonafa nogota bandata ma wagape si'i awasi mamasas akasi. Endilisi afa' ina wati amagahipama, apa' ukup afa'ipi pape palomepa. Isimba atis dei' wanda' maol banagambel a'owa' ma uti ano'w ufa'wa ofo'o ugati amagahipama. Afa' ukup paipailipa a'owa' ma ugatilipa.

<sup>18</sup> Ea' dei' wa'i ofe'mago ipa'. Ae' Pol anda'as nimaguf hiafi a'i efo'o, owa' Satan nahefamafa ufa'w.\*

<sup>19-20</sup> Anaf Dembinai ape'inai nugafi'i wapani, dao' apa' mulutu nogohnaep ananisi. Afamba afa' ukup be'ep pepoma main? Ea' ondagala ma hiahawes mais fasisi? Owa'atin. Nemaf afamba afa' ondagalama ipa' atipa. Afamba afa' hiapai mofe' mope mogalomana.

### 3

*Pol nasapa' Timoti nafe'ma nogowa' banagas*

<sup>1-2</sup> Afa' dei' ina wame' anif basefa ipa' pape pa'imama, ata' owa'atin. Dei' wandaiwa'ma ata' ogape nogota laota na'a'e. Ea' wa'i afa' atofa biafa ope na'a wambel lu'wambili Atens, ea' wasapa' owamafa afa'inai Timoti wanda' maol atin Godi

---

\* **2:16** 1 Te 3:10      \* **2:18** Fl 2:15-16, 4:1; 2 Te 1:4

nofo'o ma niga'ipasa basef bu'wafi Kraisi. Was-apa'ana nafo'o nowa banagaipa notopalopepa ma pigahapifana banagepa.\*

<sup>3</sup> Na'amba atiasi anipa pendafa'ma hiahaom amamba akafimi lu'wami, ea' pewa alafugaha God. Ipa' pegawa ea', God atona nandandepapa ma mogofa' hiahaom amamba akafimi.\*

<sup>4</sup> Aho', fowa' afa' wape wagalomepa, wa'ipipa wa'i, "Anaf afa' ofa akafimi." Ea' isimba dei' satagamafa si'i fowa' wa'ipipa pegegawas.\*

<sup>5</sup> Ae' ina ata' epe esasa wapani, owa'. A'i a' efo'o. Ea' asapa' anona amana nafo'o nogogawa hapif ipe'ini ma nogatopalopepa. Na'amba aman anamba aunai Satan nanda' kikipai ni'i'ipipa ma waf awafi, ea' maol afa' wanda'ani nenalo dowaf.\*

### *Pol sonahana ma Timoti nogofa'ai basef fasifi*

<sup>6</sup> Timoti nakwahepa ea' dei' atef nafi'mai afa', nawalapa basef fasifi ma afa'. Na'ipafa ma ipa' pahapifa Kraisa ukup pagapagaila anis epes daias. Ea' na'i ipa' pa'i petolofa, afa' wapani wa'i utilipa.\*

<sup>7</sup> Ipa' Kristen alipipai afa'ipai, afa' wame' basef ifimba ogawa ipa' pahapilif pape. Ea' sonahafa ma ipa', wame' ipa' pahapifana pagape. Isimba atis sowa' banagafa ma nimanimi hiami ogofa'ami.

<sup>8</sup> I'i ipa' pepe banagepama Dembinai, afa' wapani ope ondagala ambal namili endilisi.

---

\* **3:1-2** Ef 3:13; 2 Ti 3:12; Ap 17:15; Ap 16:1-3

\* **3:3** Ap 14:22

\* **3:4** Fl 2:16 \* **3:5** Ap 18:5 \* **3:6** 2 Te 1:4

<sup>9</sup> Afa' sonahafa endilisi ma naep God afa'inai. Ipa' pahapifana la'ifipa. Ea' afa' wanifela Goda dagala nagaso'afani.

<sup>10</sup> Dondol owamb alip afa' wanda' betenepa dindinipa wa'i ugati amagahipama ogogawa ipa' pahapifana banagepa a'a owa'? Afa' wa'i ofo'o ma ogatopalopepa pegaso'ana opalef God banagam-bela pegape andeande'.

*Pol nanda' betena Goda notopalopana nogafe'mago esis*

<sup>11</sup> Afa' wandabeten wahali' ahamafa afa'inai God naloma Dembinai Jisasa monda' ufa'w kogal motopalopafa ogafe'mago ipa'.

<sup>12</sup> Afa' wa'i Dembinai notopalopepa ma waf afamba pendasoso'ama opalef ipe'ilifi hi'indalalef ea' pese'asalef esis hiasi wapani, waf afamba a' fendataga lu'wifa ipa', si'i afa' wali' wagase'epa nelelemb.\*

<sup>13</sup> Wa'i ipa' penda' waf afambai ma God noga'owa' banaga opalef ipe'ilifi. Ama anaf Dembinai ape'inai netambel nifi'i nogalumai esis hiasi sagahapifanai sagape hilili'i ma ipa' pegape be'epa hilili' diga basef akepa ma naep Godi ahamapa ape'inai.

## 4

<sup>1</sup> Alipipai, fowa' afa' wa'ipipa wihimba'mepa waf ipa' pepe pefe' andeande' ma pigailafi, si'i God okom maga'iefi. Fowa' pailaf dei' wapani pilaf atapif. Ea' afa' wahali'ipa wasa'ma ukup ipe'ipi

---

\* **3:10** 2 Te 2:16      \* **3:12** Fl 1:10; 2 Te 1:7,10



ma agol Dembinai Jisasa pilaf penda'af fefe' atin fetaga lu'uf.\*

<sup>2</sup> Ipa' pegawa basef ifimba wagawalapefa ipe'i ma agol Dembinai ape'inai Jisas.\*

<sup>3</sup> Okom Godi na'amba. Ipa' amam nematawa pepe be'epa hilili' ananipai atipa ma pindihi'ama waf afamba so'a waulafi.\*

<sup>4</sup> Ipa' amam hipai, nemaf mamahefa pa'i pegaso' nematawa pila waf God naga'iefi pendaso'ama andeande' pepe hilili'. Nomonas sopaipa pimafi alop ipe'ipi andeande' datima ma waf awafi so'a waulafi akepa.

<sup>5</sup> Waf afamba na'amba. Nelelemb ipe'ilimbi owa'i usihilimba waf awafi sanda' so'a waulafia, si'i isimba sogololama God sanda'afi, owa'i. Hapaifi.\*

<sup>6</sup> Ea' ipa' amam ina a' penda' waf awafi ma esis sahin owan ipe'isi pefa' nematawa anom amami, owa'i. Dembinai okom wandafunai nagapomasi epes isimbai sanda' waf afambai ma na'i nogagwamasa waf afamba awafi esis sanda'afi. Fowa' afa' wawalapa isimba alihis wa'ipipas dindinip.\*

<sup>7</sup> Dembinai God ina nofalapa ma monda' waf afamba awafi, owa'atin. Anen nofalapa ma mugaila waf fasifi hilili'i.\*

<sup>8</sup> Basef Godi fa'i apa' ina monda' waf so'a waulafi, owa'atin. Ea' epes mamahisa sogowa' alafugaha basef ifimbai, ina sowa' alafugaha epes atis, owa'atin. Sowa' alafugaha God wapani. God

---

\* **4:1** 2 Te 3:6      \* **4:2** 1 Te 5:23; Hi 10:10; 1 Pi 1:16      \* **4:3** 1 Ko

6:13,15; Sam 79:6      \* **4:5** Sam 94:1      \* **4:6** 2 Te 2:13-14; 1 Pi 1:15-16

\* **4:7** Lu 10:16; Esi 36:27; Esi 37:14; 2 Ko 1:22

atona nase'epa Ambal bu'unai ananinai.\*

<sup>9</sup> Dei' afa' ina ata' onda' anif basefa ipa' ma waf afamba ipa' ukup pigapigaila esis hiasi sahin owanasafi, owa'atin. God nawalipipa hi'alepa ma waf afambai.\*

<sup>10</sup> Ipa' pagaso'asa opalef esis sahin owani anamba itap lu'upa Masedoniai. Ipa' alipipai, afa' wa'ipipa dindinip wa'i, ipa' ukup pipila esis sahin owan isimba penda' waf afambai fetaga fefe' banagef.\*

<sup>11</sup> Ipa' nomonas solasefe' banagesa pegape sa'ombel pigimafi hiahawes ipe'isi andeande'. Penda' maol lagof ipe'igufi si'i fowa' waga'ipipa.\*

<sup>12</sup> Penda'as na'amba ma pegafe' andeande' naep esis isimba owa' ata' sombema nelelemb sogataga Kristenia. Ea' penda'as na'amba ma ina waowaola anis hiahawes, owa'atin endilisi.\*

### *Atiasi Dembinai notanima nifi'i wapani*

<sup>13</sup> Ipa' sahin owan, afa' wa'i ipa' pegawa andeande'ma amam nematawa isimba sagaga'i. Na'amba nelelemb ipe'ilimbi ukup pipilas pelopas si'i isimba sogololama hapifi sanda'am. Esis owa' sogawa ma sope sogasasa nemaf afamba anaf sotambel sogosafel wapani wandelefafia.\*

<sup>14</sup> Apa' mahapifa Jisas, anen naga' sawana ea' notanima nosafel. Isimba atis dei' mogawa mahapifa Goda anaf nowambilai esis Kristen isimba

---

\* **4:8** Jo 13:34    \* **4:9** 2 Te 3:4    \* **4:10** Ef 4:28; 2 Te 3:8,12    \* **4:11**  
1 Ko 5:12-13; Kl 4:5    \* **4:12** Ef 2:12    \* **4:13** Ro 14:9; 1 Ko 15:3-4,12

sagahapifana endilisi ma sagaga'i sosafel wapani sufi'i sogaloma Jisas.\*

<sup>15</sup> Afa' wawalapa basef Dembinai atifa ipa' na'amba. Anaf Dembinai notanima nugafi'i, apa' amam nematawa ata' magape itapi ambagof ata' fagapaipai, apa' ina atiasi muli' mofe'ma esis isimba sagaga'i, owa'atin.\*

<sup>16</sup> Dembinai nifi'i ni'i dindinip a'owa' ea' ensel Dembinai noga ni'i basef banagafi mehup, nufapula alof lu'unai Godi nondam nogal mehup. Nogota atamba Dembinai nokwaha heven nisila'i. Ea' sagahapifa Kraisi fowa' sali' sagaga'i, atiasi sili' sosafel.\*

<sup>17</sup> Ama main owa', nemaf afamba atef Dembinai nofa'apa amam nematawa ambagof fagapaipai molota otaga ilif moloma amam nematawa isimba muti Dembinai. Ea' apa' hiapai mope molomana dondol lifilafi.

<sup>18</sup> Isimba atis dei' pendewa' banagama atina nelelemb ipe'ilimbi ma basef ifimba.

## 5

*Apa' dumbili dombol mopoma Dembinai nogafi'i*

<sup>1</sup> Ipa' amam nematawa afa'ipai alipipai, afa' ina onda' anif basef laufi ma uga'ipipa nemaf afamba hiahawes isimba sogataga, owa'atin.\*

---

\* **4:14** 1 Ko 15:51      \* **4:15** 1 Te 1:10; 2 Te 1:7; 1 Ko 15:52      \* **4:16**  
Jo 12:26      \* **5:1** Mt 24:42-44; 2 Pi 3:10; Re 3:3; Mt 24:36

<sup>2</sup> Ipa' pegawa ea' nemaf afamba Dembinai nigafi'afii. Anen nogafi'i nifi'i si'i epen nanda' wali nagafi'i owamba pa'oh pegelelamana.\*

<sup>3</sup> Atiasi anis amam nematawa si'ias si'i, "Ea' dei' a' nemaf bu'wafi ma tol mogape andeande'."

Esis owa' si'ias na'amba owa', nogota atamba atota hiahaom mogahambombaga alop asasipii motagamas kwafalis atis, si'i nemata'w kwagame' akepa kogola batawin. Ea' esis ina atiasi sindihi'ama hiahaom amamba, owa'atin.

<sup>4</sup> Apa' ipa' alipipai, ina ata' pagape owamb akuti si'i isimba sogololama Dembinai, owa'. Ipa' ina bombolalalasipa ma nemaf afamba fegataga si'i bombolagalasipa ma aman nanda' wali nagafi'i, owa'atin.\*

<sup>5</sup> Ipa' epes hipai pagape lagala alipi. Ina si'i epes sagape owamb akuti, owa'atin.

<sup>6</sup> Ea' ipa' ina penda'as si'i isimba anis ukup paso'as sa'oh sogololai, owa'atin. Andeande'ma apa' ukup talambi mope naep pegetawa.

<sup>7</sup> Apa' mogawa esis isimba saga'ihhi esis sa'oh owamb atomb. Ea' isimba sa' embela sahaga sagagauli sanda'am owamb atona.\*

<sup>8</sup> Apa' mape si'i epes sagape alipi, nomonas sondapaepa mumafi alop andeande'. Apa' mofa' waf afamba mogahapifana banagepa ma mogaso'as opalef anis, si'i sanda' wandafi sofa' walitah sanda' wandafa magahagasa wambawa. Apa' mogawa basef amamba owagama God nofa'apa mogotanimai. Ukup pendanda' ma

---

\* 5:2 Esi 13:10; Mt 24:39; Lu 21:34-35; Jo 16:21-22 \* 5:4 Ro 13:12; Ef 5:9 \* 5:7 Ef 6:14,17

basef amamba si'i mogowalo' anota hat banagitai tigili'ama balagah.\*

<sup>9</sup> Dembinai God ina nosaho'apa ma mogofa' okom wandafunai ananinai nogahambombagapa, owa'atin. Anen nosaho'apa ma Jisas Krai Dembinai ape'inai nowambelapa mogotanimai.\*

<sup>10</sup> Fowa' anen naga' ma nogatopalopapa, i'i nemaf afamba anen nogotanimai mope ambagof fopaepa a'a moga', mofe' mope namepa molo-mana.\*

<sup>11</sup> Dei' ipa' hipai pewa' banaga nelelemb ipe'ilimbi pendatopalopa atin si'i dei' pape panda'as.\*

### *Anif basef figawalipipai*

<sup>12</sup> Ipa' Kristen alipipai afa'ipai, afa' wa'ipipa na'amba, wa'i amom agufumi mugumafi esis Kristeni, anom manda' maol numa'wini malomepa matopalopepa. Ipa' pendafe' lafela amom. Dembinai nanda'am mape agufumi ipe'imi ma mogawa monda' nomonas ipe'isi usi'is.

<sup>13</sup> Ipa' ukup pepoma maol amamini, ea' ukup pipilam be'ep pepomam endilisi. Ea' ukup atifip pindaima atin peloma esis sahin owan.\*

<sup>14</sup> Ipa' Kristen alipipai afa'ipai, afa' wa'ipipago dindinip wasa'ma ukup ipe'ipi ma pegatopalopago isimba ala'uta nagahasi banagambel pi'ipasa sokwahago waf ala'uta nagahasanai. Ea' anis ambagof fondola'asi ma owa' siga'i anif basefia, ipa' pewa' banagasa

---

\* 5:8 1 Te 1:10; 2 Te 2:14      \* 5:9 Ro 14:8-9; 1 Te 4:14      \* 5:10 Ju 20  
 \* 5:11 1 Ko 16:18; 1 Ti 5:17      \* 5:13 2 Te 3:6,11,15

sigai anif basef. Ea' pewa' banaga anis owa' sogahapifana banagesia. Penda' waf sa'umbilifi ma esis hiasi.\*

15 Na'amba ipa' pegwamasa waf awafi anis epes sanda'mepaf ipe'i, owa'i. Dondol pilutu banagepa ma waf bu'wafi atef, pendanda'maf atin. Ea' penda'masaf isimba anis hiasi wapani.\*

16 Ipa' pendagala liflafi.\*

17 Pendabeten pihali' God dondol owamb alip.\*

18 Ipa' pinifelona hiahawes hiasi. Ipa' pagape sisihipama Kraisi Jisasi, God na'i ipa' penda' waf fasifi pinifelonama hiahawes hiasi.\*

19 Ipa' ina pipihi' nif ifimba ma maol Ambal bu'unai Godi nanda'ani, owa'i.\*

20 Ipa' ina pewa' alafugaha basef Godi Ambal bu'unai nasa'mas saga'ipipafi, owa'i.\*

21 Pewaloga basef hiafi, ma pihapila basef fasifi atif tatala'if.

22 Ea' pindihi'ama hiahaom awami mamimami hiami.\*

23 God anen kofagonama nomonas awanisi. Ae' a'i anen atona nonda'epa pepe be'epa hilili' ananipai atipa. A'i anen numafi ambagof foloma alop nomonas ipe'isi andeande'ma waf awafi akepa, pegape hilili' ma nemaf afamba Dembinai ape'inai Jisasi Kraisi nogotanimaffi.

24 God nogofalipai, andeande' a'owa'. Basef feloma maol main na'ias ea' ma nonda'asi, atiasi

\* 5:14 Pro 20:22; Ro 12:17; 1 Pi 3:9 \* 5:15 Fl 4:4 \* 5:16 Lu 18:1

\* 5:17 Ef 5:20 \* 5:18 Ef 4:30 \* 5:19 1 Ko 14:1,39 \* 5:20 1 Jo

4:1; Jop 1:1,8, 2:3 \* 5:22 1 Ko 1:9; 2 Te 3:3

anen nonda'as endilisi andeande' datimai.\*

<sup>25</sup> Ipa' Kristen alipipai, pendanda' betena God nogatopalopafa.\*

<sup>26</sup> Ipa' pendaso'ama lagof pendanda'ma nemaf bu'wafi peloma esis Kristen alipisi hiasi.

<sup>27</sup> Ae' a'ipipa dindinipa agol Dembinaii, ipa' pi'i basef ifimba ma esis Kristen alipisi hiasi.

<sup>28</sup> Afa' waga'ias na'amba wa'i, Jisas Krais no-topalopepa dowaf nowa' banagaipago. Ea' ma'uf.

---

\* 5:24 Kl 4:3, 2 Te 3:1      \* 5:25 Ro 16:16

**Basef Bu'wafi Godi**  
**The New Testament in the Mufian Language**  
**Nupela Testamen long tokples Mufian long Niugini**  
copyright © 1998 Wycliffe Bible Translators, Inc.

Language: Mufian

Dialect: Mufian

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

---

PDF generated using Haiola and XeLaTeX on 18 Apr 2025 from source files dated 31 Aug 2023

b0cff915-4005-598f-9bbc-38b1e35d47b1